

PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL PERTAMA,
PARLIMEN KEEMPAT BELAS

PERTANYAAN : LISAN

**DARIPADA : TUAN AKMAL NASRULLAH BIN MOHD NASIR
[JOHOR BAHRU]**

TARIKH : 10 JULAI 2018 (RABU)

SOALAN

Tuan Akmal Nasrullah bin Mohd. Nasir [Johor Bahru] minta
PERDANA MENTERI menyatakan:

- a) langkah-langkah yang telah diambil oleh Amanah Ikhtiar Malaysia (AIM) bagi memenuhi kembali syarat Suratcara Ikatan Amanah; dan
- b) perkembangan tindakan undang-undang terhadap pihak yang didapati telah melanggar peraturan penubuhan AIM.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JPM

Tuan Yang di-Pertua,

1. Amanah Ikhtiar Malaysia (AIM) telah diperbadankan dibawah Akta Pemegang (Pemerbadanan) 1952 [Akta 258] pada 20 Oktober 1988 melalui Surat Ikatan Amanah asal bertarikh 17 September 1987. Untuk makluman Tuan Yang di-Pertua, sehingga kini Amanah Ikhtiar Malaysia (AIM) belum mengemukakan permohonan rasmi untuk meminda Surat Ikatan Amanah asal bagi tujuan memastikan kandungan Surat Ikatan Amanah memenuhi peruntukan Akta 258 serta polisi dalaman Bahagian Hal Ehwal Undang-Undang (BHEUU).

2. Keperluan pindaan Surat Ikatan Amanah asal akan membolehkan tadbir urus AIM yang lebih efektif dan teratur selaras dengan prinsip *good governance* sekaligus mengelakkan kebarangkalian Menteri melalui seksyen 17(1)(c) Akta Pemegang Amanah (Pemerbadanan) 1952 [Akta 258] **menggantung Sijil Pemerbadanan AIM** sekiranya Yayasan didapati telah melaksanakan aktiviti/program yang bercanggah dengan objektif sebagaimana dinyatakan melalui Surat Ikatan Amanah asal dan Surat Ikatan Amanah seterusnya.
3. Dalam hal ini, Lembaga Pemegang Amanah AIM telah dinasihatkan oleh Kementerian Kewangan Malaysia untuk melantik wakil-wakil Kerajaan sebagai sebahagian daripada ahli Lembaga Pemegang Amanah AIM yang baharu dan dalam konteks ini, syor berkenaan adalah selaras dengan aspirasi Kerajaan mewujudkan semak dan imbang (*check and balance*) bagi memastikan pengurusan AIM yang lebih teratur.

Tuan Yang di-Pertua,

4. Sehingga hari ini, tiada mana-mana pihak yang dituduh secara rasmi atau disabitkan dibawah mana-mana perundangan sedia ada diatas kesalahan melanggar peraturan penubuhan AIM. Oleh yang demikian, tiada sebarang tindakan undang-undang yang diambil terhadap pihak yang didapati melanggar peraturan penubuhan AIM. Walau bagaimanapun, pemantauan dan *off-site supervision* akan sentiasa dilaksanakan dari masa ke semasa bagi memastikan Lembaga Pemegang Amanah AIM yang baharu patuh dan akur terhadap kandungan Surat Ikatan Amanah sedia ada selain sentiasa mengaplikasikan aspek tadbir urus yang baik dalam menguruskan AIM. Keadaan ini akan meminimumkan risiko dana AIM disalah guna bagi kepentingan pihak tertentu dan bukan untuk manfaat masyarakat yang memerlukan.

Sekian. Terima kasih.